



# Tir Yimiyim

www.tiryimiyim.in

Regd. No. RNI. NAGAAO/2004/13113. Postal-NE/RN-717.

e-mail: tiryimiyim@gmail.com

TAPAK 7

Yangia anidakangma :



Tir Yimiyim



tir\_yimiyim



tir yimiyim

TAPAK 8

**Nigeria nung ISIL züngsem 175 tepsetogo**

**Carlos Alcaraz Wimbledon nung masayatsü**



VOL. XXIII ISSUE NO. 217 (ADOK 217) DIMAPUR YANGTEPNÜ (THURSDAY) MONUPII (MAY) 21, 2026

₹ 5.00

## DMC nung mepetmesü anenogo

**Dimapur, May 20, 2026 (TYO):** NPF party lennirtem tiyongtsü aiba ajang Dimapur Municipal Council (DMC) nung NPF Councillor tem tsüngda tangatetep kati aruogo.

Party longjema alitsü aser Dimapur nung alirtem tenzüksü tenangzükba nung ajemdaker parnok tsüngda ken o tem angatetepogo.

"Onok tsüngda ken o tem angatetepogo aser onok nem tebilemsü khuret agütsüba tajungtiba agi inyaka aotsü nenshir. Onoki DMC tajungba ketdangsütsü aser tashitsütsü melii inyaka aotsü nangzük" ta DMC Chairperson Hukheto Yepthomi

aser Deputy Chairperson Imlinaro Stephanie Ezung nati külem sangdong ka nung ashi.

Züngsem ajak putepshioigo aser külemi telok ka ama inyaka aotsü mulungtepogo. Onoki bangdakpurtem dang May 22, 2026 nü trust vote agitsü jazükba athitsü metetdaksüogo ta sangdong nungsa shia lir.

Onoki nübor ajak dang Dimapur yimti renloka aotsü alizüngtem tongtetsüsa yariteptsü mepishir ta Hukheto aser Imlinaro nati metetdaksüogo.

DMC deputy chairperson dena councilor 12-i Chairperson Hukheto Yepthomi anema no-confidence motion benoka liasü.

## Nagaland media teloki Governor Yadav den ajurutep

**Dimapur, May 20, 2026 (TYO):** Nagaland nungi media teshimtet telok kati tanü Nagaland Governor Nand Kishore Yadav den ajurutepogo.

Head of Office, PIB & CBC, Kohima P. Sophie-i anir journalists teneti Governor den ajurutep. Nagaland nungi media teshimtet telok kati tawa Bihar nung media exposure visit ser aruba sülen pa den ajurutepogo.

Parnoki Governor dang press tour mapang ajangshibatem lemsatp. Parnoki Bihar nung sobaliba senmang takar anguba

den state sorkari terenlok mapa inyakba balala anguba indang lemsatp.

Governor Yadav-i PIB Nagaland dang ibala exposure visits ayonga agiba atema tenüngsang agütsü. Ibala sentong ajanga journalists tali shisatsü angur aser inter-state tangatetep akangshir ta pai ashi.

PIB Nagaland media exposure tour ya March 16 nungi March 21, 2026 tashi agia liasü. Iba mapang parnoki Bihar nung Patna, Nalanda, Rajgir, aser Bodh Gaya tesemtem semdanga senzü.

## KSO-i anir lungkak aitba sentong agi

**Imphal, May 20, 2026 (Agencies):** May 20, 2026 nü Kuki Students Organisation (KSO), Ukhrul District-i Shangkai Village nung lungkak aitba sentong ka agiogo.

Kuki-Zo civilians pur aoba chioktsü aser Manipur kübok sorkari mapa shitak meinyakba atema parnoki lungkak ait.

Iba sentong ya KSO-i Kuki Women Union (KWU) den külemi ayongzük aser kaketshirtem, tesayurtem, yimtsüng lennirtem, civil society

teloktem aser sensotem aden.

Parnoki March 19 Memorandum of Understanding (MoU) mapa tenzüksü takhangba agütsü. Iba mapa metenzükba ajanga Kuki kaketshirtemi tayongzükba jenti ajurur ta lungkak aitertemi ashi.

"Ketdangsürtemi mapa meinyaker aser March 19 MoU mapa metenzükba ya political tsütsü menuba dang masü saka temulung alemba aser yimjung ashioktsüba lir" ta KSO Ukhrul Vice-President Mercy-i ashi.

## Signal Angami village nung ASF puteta lir

**Dimapur, May 20, 2026 (TYO):** Dimapur district kübok Signal Angami village nung African Swine Fever (ASF) puteta aliba nung ajemdaker Dimapur Deputy Commissioner-i infected zones aser surveillance zone osang metetdaksüogo.

Signal Angami village telongtet kilometer 1 ya infected zone aser iba tesem nungi 10km telongtet surveillance zone ama sangoktsür. Iba tesem nungi tangaleni ak/ak chanu belentsü memelar ta Dimapur DC-i sangdong ka nung ashi.

Tangaleni nungi infected/surveillance zones-i ak, akshi, ak

chiyungtsü, ak tasü mesüra ak dak sendakba products bener arutsü memelar. Tanga tetuyuba ka magütsü tashi infected area nung ak tepsetba, ayokba, belenba aser ak bener arutsü noktanger ta paisa metetdaksü.

Departments, village/ ward councils, ak metsürtem, akshi ayokertem, ak belenertem aser public-i item tetuyuba sülen anidaksü metetdaksür. ASF prokshia moudaktsütsü atema district administration aser Veterinary department-i inyakba mapa nung ajaki yariteptsü mepishir ta Dimapur DC-isa metetdaksüogo.

## Union Minister Manjhi-i Longleng district nung terenlok asadang



May 20, 2026 nü Rhododendron Hall, Police Complex, Chümoukedima nung Union MSME Minister Jitan Ram Manjhi-i Longleng district ketdangsürtem den senden amendang agiba noksa ka angur.

**Dimapur, May 20, 2026 (TYO):** Union Minister for Micro, Small and Medium Enterprises (MSME), Jitan Ram Manjhi-i Longleng district nungi department balala den senden ka menogo.

May 20, 2026 nü Rhododendron Hall, Police Complex, Chümoukedima nung Longleng Deputy Commissioner aser DPDB Vice-Chairman W. Manpai Phom, NCS menden ser iba senden menogo.

Senden nung Union Minister Manjhi-i Longleng district nung India sorkar kübok schemes aser programmes inyakba osang metetpela. Iba mapang department balala nungi ketdangsürtemi osangtem lemsatp.

Manjhi-i MSME dak sendakba maparen jungjunga inyaksü aser ketdangsürtem dang nübortem welfare aser economic development atema külemi inyaksü ayongzük.

Prime Minister Narendra Modi-i district nung mapa inyakba aser terenlok nungdakba asadangtsü tetuyuba

agütsüba ama iba senden amener. Iba osang ya Prime Minister's Office aser bangdak Union Ministry tem nem agütsütsü ta central team-i ashi.

MLA & Chairman DPDB, Longleng A. Pongshi Phom-ia central team dang pelaba metetdaksü aser India sorkar linük ajungalen people-centric welfare schemes aser developmental programmes inyakba atema tenüngsang agütsü.

Centrally sponsored scheme balala ajanga agriculture, health, education, rural development, solar energy, industries, electricity, social security aser welfare sectors tajungba akümer aser iba ajanga nübortem ajangzük ta Pongshi Phom-isa ashi.

Longleng district nung Department of Industries and Commerce ajanga lanurtem self-employment opportunities ajanga tashi itdaksür. Prime Minister Employment Generation Programme (PMEGP) amala scheme ajanga lanur entrepreneurs yarir aser tangar

asoshi mapa adokdaksür ta paisa metetdaksü.

Nagaland sorkari 2022 nung Chief Minister's Micro Finance Initiative tenzükba atema tenüngsang agütsür kechiyong iba ajanga private enterprises yarir aser yimtsüng nung taküm aika melenshidaksüogo ta paisa shisem.

Chief Minister Neiphiu Rio lenisüba kübok Nagaland sorkari tayongzükba jenti liaka nübortem asoshi inyaka arur ta paisa ashi.

Union MSME Minister Jitan Ram Manjhi-ia Longleng district administration aser department balala nem tenüngsang agütsü.

Paisa ketdangsürtem dang government programmes-i nübortem atongtsü atema bendanga agütsütsü aser meranga inyaksü ayongzük.

Union Minister Manjhi-isa tanü Police Guest House nung National Small Industries Corporation (NSIC), Khadi and Village Industries Commission (KVIC), Coir Board aser Ministry of MSME kübok MSME-DFO nunger den ajurutepa senden menogo.

## Naga tsürtemi civilian 6 chioktsü takhangba agütsü

**Imphal, May 20, 2026 (Agencies):** Manipur kübok Ukhrul, Senapati aser Chandel district tem nung Naga tsürtemi civilians trok chiokang ta takhangba agütsü lungkak aitogo.

May 13, 2026 nü Kuki nungeri pur aoba civilian 6 chiokang ta parnoki takhangba agütsü.

Parnoki Naga nunger tesemtem nung Suspension of Operation (SoO) tenangzüktep agientsü aser Deputy Chief Minister Nemcha Kipgen mapa nungi anentsü takhangba agütsüogo.

Hopta ka tema nisung trok mechiokba agi nübortem security forces aser sorkar dang mepelar aser Naga teloktemi maneni parnok chioktsü atema inyaka arur.

Naga lennir balalai Manipur Chief Minister nem memorandums agütsüogo aser item nung pua alirtem mechiokra kin o kin mangatetep tuluba akümtsü ta tekümdangtsü shiogo.

Ukhrul, Senapati, aser Chandel nung lungkak aitertemi shishilembaba ajak shibang aser sorkar dang tekaratiba nung aibelenertem aputsü aser public-i temulung alemtsüsa mapa inyaksü ayongzükogo.

Parnoki "Listen to people's voice! Scrap the SoO!" yimiyim ayima lungkak ait.

Naga nunger trok- Rev. Manu Thiumai, Kenpibou Chawang, Dilip Thiumai, Kaliwangbou Abonmai, Phenrongwibou Thiumai, aser Ch. Phenrilungbou nunger tang tashi mechiok lir ta TSL president-i züluba memorandum nung shia lir.

Senapati district nung lungkak aitertemi iba tatalokba aitsü aser parnoki "Justice is not a negotiation," "The innocent must walk free," "Secure the civilians," aser "Truth shall prevail over propaganda" tezülubatam amer jaja.

Naga nungertem ya May 13 nü Leilon Vaiphei village nungi pur ao aser central security

forces-i mapa meinyakba atema ashishir ta lungkak aiter kati ashi.

"Naga nungertem ya Kuki tesem nung Kuki nungeri pur ao. Kechiba parnok chioktsü atema security forces-i Leilon Vaiphei village nunger dang indangindanga masüngdang" ta paisa ashi.

Bodbarnü Chandel nung Naga tsür noklang aika district headquarters nung mener lungkak ait.

Naga Women's Union-i ayongzükba sülen iba sentong ya Naga Women Union, Chandel ajanga ayongzükba agiogo.

Item sentongtem nung Tangkhul Naga Long (TNL), Tangkhul Naga Awunga Long (TNAL), Tangkhul Katamnao Saklong (TKS), aser Tangkhul Naga women's units-i pusema nungit.

Maneni, New Checkon, Imphal East nung Tribal Market nunga Naga Women Union-i lungkak aitba sentong ayonga agiogo.

## Kohima nung Surveyors/Voluntary Teachers orientation sentong agi



Kohima nung Surveyors/Voluntary Teachers orientation sentong nung tangokba noksa angur.

**Dimapur, Monupii/May 20 (TYO):**

ULLAS (Understanding Lifelong Learning for All in Society): Nav Bharat Saaksharta Karyakram kübok Survetors/Voluntary Teachers atema orientation sentong ka May 20, 2026 nü Capital Convention Centre, Kohima nung agia liasü.

Additional Deputy Commissioner, Kohima, Ruopfükoutuo Noudi, NCS ajanga iba sentong ayongzükba nükjidong lensatepdang ULLAS ya 2027 tashinung full literacy akumtsü nükjidong nung tenzükba centrally sponsored scheme ka lir ta ashi.

Iba sentong yagi arishi küm 15 aser tema azüngtsü aser zülutsü memetet aliba nüburttem dak tenük yoker aser parnok nem foundation literacy aser life

skills agüja parnok takum melenshiba den state nung nüburttem azüngtsü aser zülutsü meteta ali kumdaktsütsü nükjidong lir.

Literacy rate tsütsü Nagaland kanga junga lir, ajisüaka ano nisung kar azüngtsü aser zülutsü memetet aser formal education ajanga mawajemer, ta pai ashi.

Anungji iba atema survey ka kanga tongtipang lir aser state nung 100 percent literacy ajungtsü imlar ta ashi.

Iba sentong indang nükjidong ya pei tenüng zülutsü atema sayuba kisüing masü saka basic reading, writing, functional aser digital literacy skills agütsütsü asoshi lir ta pai ashi.

District Education Officer, Kohima, Emilo Patton-i sentong nung adener pela agizükba o

jembi aser surveyors tem dang azüngtsü aser zülutsü memetetba nisung tain tem jangjateta zülüoktsü ayongzükba liasü.

Surveyors/Voluntary Teachers nem training agütsüba mapang ULLAS implementation, survey procedures, ULLAS App, aser ULLAS Primer onüktem awajema liasü.

Iba sentong nung shisalen sayur ya Zulumenla (ToT), Meyiesul Thapru (ToT), Hinilo Cheng (ToT), aser Vibeizolie Yashü (ToT) liasü.

Sentong nung ADC & DMA, Samagra Shiksha, Kohima, Ruokuoneinuo menden liasü aser Sr. SDEO Kohima, Imtisangla-i melepzüng o jembia sentong tembang.

## Kohima nung Census 2027 Field Trainers atema training tenzükogo



Kohima nung Census 2027 Field Trainers atema training agiba sentong nung tangokba noksa angur. (Kohima, May 20, 2026)

**Dimapur, Monupii/May 20 (TYO):**

Census of India 2027 kübok Field Trainers atema asemnü mandatory training programme ka May 20, 2026 nü Commissioner's Circuit House, Kohima nung tenzükogo kong Kohima, Tseminyu, Wokha aser Zunheboto districts tem nungi Field Trainers tem shilem agia liasü.

Sentong tenzükba SDO (Civil) Sadar, Er. Seyiekhrietuo Solo-i jembidang, Census exercise ya tekolakzüng kisüing masü aser state terenlok maparen nunga kongshir, ta ashi.

Pai 2001 aser 2011 Census athishia jembidang data nung metokmeperi aliba ajanga lenla balala nung developmental indicators aser planning nung kongshiba ashi aser aruyaa aliba Census ya temulung agüja shidak agitsü ayongzükba liasü.

Field Trainers ya Census inyakym nung tangartem ama tongtipang lir, kechiaser

enumerators aser field workers training parnoki agütsütsü, ta Solo-i ashi.

Pai shilem agirtem dang asemnü training nung shisalen sayurtem den asüingdangyatepa adentsü ajungshia liasü.

Pai training agirtem dang shisatsü lemsateptsü aser kati ka yaritsü ayongzük aser shilem agirtemi pei mapa bendanga agütsür inyaktsü temulung lemtetba lemsatep.

Additional District Census Officer, Kohima and Training Coordinator, Dr. Riku Khutso-i sentong tenzükba jembidang, ibai Field Trainers asoshi phase mezüingbuba training tetenzük alitsü aser parnoki pei districts nung enumerators aser supervisors nem training agütsütsü, ta metetdaksü.

Census ya July ita nungi tenzüktsü aser self-enumeration iba dang jelia tenzüktsü ta ashi.

Census ya full-scale digital operation ajanga agitsü aser maparen balala asoshi

ketdangsiur jangjatepba asoshi pelaba lemsatepa liasü.

Pai shilem agirtem dang Master Trainers den amalitep akatsü, temulung agütsütsü aser pei district nung oa tajungtiba nung field functionaries yaritsü ajungmesoa liasü.

ADCO, Directorate of Census Operations, Mhathung Kithan-i iba training ayongsüba atema district administration dang pelaba lemsatepa liasü. Taoba mapang ama masü 2027 Census nung five-level training structure alitsü ta pai metetdaksü.

Iba training nung Kohima, Tseminyu, Wokha aser Zunheboto districts tem nungi Field Trainers 36 adener. Iba training nung Master Trainers ya Tosovil Niekha, Associate Professor, Kohima Science College aser Kohima district nungi Master Trainer aser Directorate of Census Operations nungi Temjensunep nungertem alitsü.

## Khar Kaketshir Telongjem Dimapur lokti senden ayonger

**Dimapur, Monupii/May 20 (TYO):**

Khar Kaketshir Telongjem Dimapur (KKTD) 49 buba lokti senden May 23, 2026 anepdang 10:00 ako nungi tenzükba Indisen nung kimen I. Watitemjen'er kidang amentsü,

ta KKTD sangdong ka ajanga ashi.

Anungji iba senden nung KKTD executives aser kaketshir ajak medema arua adentsü metetdaksür, ta sangdong ajangasa ashi.

## Dimapur nung mejangjaba nisung tasü mang ka nguteta lir

**Dimapur, Monupii/May 20 (TYO):**

Arishi küm 60 shi tain mejangjaba non-local tebur tasü mang ka Hazi Park, Dimapur anasa lir ta May 20, 2026 anüingdang 11:20 ako meta telephone nungi osang ka Dimapur East Police Station tangi aru, ta Dimapur Police sangdong ka ajanga ashi.

Osang angazükba sülen duty nung alirtem iba tesem tonga ao aser tasü mang meita repranga liasü. Nisungba ya shiranga asüba südi ta temulung

melemteti lir. Ozüing agi melaba maparen ajak inyakba sülen tasü mang ya PM examination/identification atema District Hospital Dumapur Morgue nung bener oa lir, ta sangdong ajanga ashi.

Nisungba ya t-shirt sentüsü tanak aser pants sentüsü tanak sema lir. Kibur/kinunger/tembar temi Officer-in-Charge, East PS, Dimapur den Mobile No. 7085055020 ajanga tongteprateptsü mepishir, ta Dimapur Police ajangasa ashi.

## IDAN-i Nagaland Food & Feed Link 2.0 workshop ayongzüktsü

**Dimapur, Monupii/May 20 (TYO):**

Investment and Development Authority of Nagaland (IDAN) ajanga Customized Energy Solutions Foundation den lungjemer Capital Conventio Centre, Kohima nung May 29, 2026 anepdang 10:00 ako nungi tenzükba Nagaland Food & Feed Link (N2FL) 2.0 indang State-Level Workshop ayongzüktsü lir.

IDAN ajanga sangdong ka nung ashiba agi, 2025 state-level workshop agiba mapang foundation yanglua aliba nung yangertsü aser 'clean energy-enabled interventions' ajanga enterprise development tashi itshitsü nükjidong nung iba workshop ya ayongzükter.

Iba ya local production ajungkettsü, productivity tajungba kumdaktsütsü, tangalen nungi bener aruba nung metaloka aliba ajemtsü aser Nagaland tesem ajunga nung rural entrepreneurs aser producer groups atema rongsen lenmang adokdaksütsü mechi inyaker, ta ashi.

Concept note nunga N2FL 2.0 yagi fibre, food, feed aser credit linkage nung tali rangloker.

Fibre value chain kübok iba sentong yagi garment stitching, bags aser anogoshi amshiba oset nung local skills yaritsü. Iba yagi mapa adokdaksütsü, local production capacity tashi itshitsü aser entrepreneurship ajungkettsü imlar.

Food value chain component yagi entrepreneurs tem product quality, packaging, sales aser market access nung yaritsü nükjidong lir.

Solar-powered processing units aser community-based training ajanga value addition aser farmer linkages tajungba akumtsü imlar.

Feed value chain yagi state nung anguba raw materials amshia local feed production ajungketba nung rangloksü. Training aser enterprise ajanga aluyimer aser shiruru metsürtem shiruru anepaluba tajungba kumdaktsütsü aser tangalen nungi shiruru chiyongtsü bener aruba nung metaloka aliba ajemtsü.

Iba workshop yagi credit linkage aser enterprise scaling nung rangloka entrepreneurs tem financial institutions, development partners aser technology agütsürtem den sendakteptsü, ta sangdong ajangasa ashi.

## Longleng nung Jan Bhagidari Abhiyan tenzükogo

**Dimapur, Monupii/May 20 (TYO):**

Longleng District Administration ajanga May 18, 2026 nü Deputy Commissioner, Longleng indang office nung Nationwide IEC Campaign "Jan Bhagidari - Sabse Door, Sabse Pehle" tenzükogo.

Iba campaign ya May 18-25 anogotem welfare scheme indang awareness agütsütsü aser sorkar indang services aser tangotsü teyari tem district tesem ajunga nung agütsütsü asoshi inyaktsü.

Deputy Commissioner Longleng, W. Manpai Phom,

NCS ajanga iba sentong nung jembidang, departments ajanga dang yimtsüngtem nung iba maparen tajungtiba nung inyaktsü ayongzükba liasü.

Iba sentong nungya village-level awareness campaigns, beneficiary saturation drives, health camps, Aadhaar enrolment, welfare scheme facilitation, aser grievance redressal sessions tem alitsü.

Iba campaign inyakym asadanga aser iba sülen mera agitsü asoshi jembitsü atema May 25 nü review meeting ka alitsü.



May 20, 2026 nü Italy nung Ato kilonser Narendra Modi aser Italy Ato kilonser, Giorgia Meloni na senden amenba sülen tangokba noksa nung angur. Kasa noksa nung Union External Affairs Minister S Jaishankar aser National Security Advisor (NSI), Ajit Doval nata angur.

### US Secretary of State, Marco Rubio-i India semdangtsü

**New Delhi, Monupii/May 20 (Agencies):** May 23-26 anogotem nung US Secretary of State, Marco Rubio-i India semdangtsü; pai New Delhi, Kolkata, Agra aser Jaipur yimitem semdangtsü.

Indo-Pacific aser Middle East nung tensa mejungi aliba mapang nung US aser India nati Quad partnership, energy security, shishilembaba aser defence sectors nung amalitepa inyaksü atema jembitsü, ta ketdangsertem osang ka ajanga metetdaksü.

US State Department-i, Rubio-i May 22 nü Helsingborg, Sweden nung NATO Foreign Minister tem senden nung adenba sülen pai India semdangtsü, ta metetdaksü.

State Department otongdar, Tommy Pigott-i sangdong ka ajanga, "Secretary-i India nungertongti ketdangsertem ajurua senden amenba mapang nung energy security, shishilembaba aser defense tsütsü amalitepa inyaksü atema jembitsü," ta metetdaksü.

Rubio-i New Delhi nung lenirtem ajuruba dak alia Quad foreign minister tem senden nunga adentsü. QUAD züngsem linüktemji India, United States, Japan aser Australia lir.

Tawa interview ka nung jembidang US-India Strategic Partnership Forum (USISPF) nung CEO, Mukesh Aghi-i, iba region atema kanga tongtibang mapang ka nung Rubio-i India

semdangtsü, ta metetdaksa liasü.

Osangbenertem den jembidang Aghi-i, "Quad asentenshitsüji kanga tongtibang, talisa tang Middle East tensa ajanga tayongzükba balala ajangshiba mapang ka nung iba senden ya kanga tongtibang asütsü," ta metetdaksü.

Paisa, Rubio-i semdangba mapang nung Strait of Hormuz nung security aser region nung yimjung atema-a jembitsüa akok, ta metetdaksü.

Aghi-i, "Secretary Rubio-i China semdangba osanga India nem metetdaksütsüa akok, kechiyong ibaji ajanga India-a kongshitsü aser India-i ibaji angatetnüsü," ta metetdaksü.

### India aser Vietnam nati defence tesendaktepreprangshi

**New Delhi, May 20 (Agencies):** Defence Minister, Rajnath Singh-i Vietnam semdangba mapang nung linük anati defence tesendaktepreprangshiba den külemi maneni tzüyim nung security atema amalitepa inyaksü bangjemogo.

Mongolbarnü India aser Vietnam nati, Indo-Pacific region nung yimjung alitsü aser sadema senzüsempongtsüji

kanga tongtibang, ta bangjem. "Defence minister Rajnath Singh aser Vietnam defence minister, General Phan Van Giang nati linük ana tsingda defence partnership tajungba akümba asadang aser maneni tzüyim nung security, defence industry, training aser region nung yimjung alitsü atema amalitepa inyaksü bangjemogo," ta defence

ministry-i metetdaksü. Defence minister ana senden amenba sülen India aser Vietnam nati artificial intelligence aser quantum technology atema amalitepa inyaksü tenangzükba agi.

Defence minister anatisa Air Force Officers' College nung Language Lab ka semzüksü. Iba Lab ya India teyari ajanga yanglua liasü.

### Tang India nung anogo shia LPG barrel 400,000 agi meperir

**New Delhi, May 20 (Agencies):** Alima nung LPG sorochockba gas teimtiba agiba linüktem rongnung India ya jenjang tasembuba nung lir, ajisüaka tang West Asia nung rara ajanga India nung anogo shia LPG barrel 400,000 agi meperir.

Talisa Iran-i khu abenba rong lenmang 'Strait of Hormuz' shibangba ajanga India nung LPG agi kanga anünger, ta osang ka ajanga metetdaksü.

Rara metenzükdang India-i nüngdakba LPG shilem 65 bo bendanglen nungi bener arua liasü. Taküm February ita nung India-i anogo shia bendanglen nungi LPG barrel 851,870 bener arua liasü, ajisüaka April ita nungbo anogo shia barrel 377,620 dang bener arutet.

LPG agi meperibaji atepteptsü atema India nung anogo shia production barrel 75,000 aliba nungi tangbo anogo shia barrel 530,000 kümogo, ajisüaka iba jagia meperir.

May 11, 2026 nü ketdangsertemi, India nung anogo 45 peritsüsa dang LPG

rizünga lir aser anogo 60 peritsüsa totzü tazü aser natural gas lir, ta metetdaksa liasü.

Rara tenzükba sülen anogo ishika lir March ita nung India nung seret 14.2 touzük LPG cylinder shia sen 60 tua liasü aser ibaji ajanga LPG cylinder ayokba shilem 13 agi ajema aküm aser April ita nunga kanga ajema aküm.

Ano Commercial LPG cylinders (seret 19) nunga sen 993 tali atu, aser ibaji ajanga Delhi aser Mumbai ama tongtibang yimti aika nung tangbo commercial LPG cylinder ka nung sen 3,000 dak tali kümogo.

India nung LPG agi meperiba atepteptsü atema India sorkari piped natural gas amshitsü ajungshir aser March ita kija nunga connections tasen lakh 5 shi liasü.

Ajisüaka India nung kibong million 16-i dang piped gas amshidar aser million 330-ibo LPG cylinder dang amshir. LPG agi kanga anüng tenzükba sülen India nung electric stovetops/induction amshirtem aika kümogo.

### Russia Tir Vladimir Putin-i India semdangtsü

**New Delhi, Monupii/May 20 (Agencies):** Taküm September ita nung Russia Tir, Vladimir Putin-i India semdangtsü aser BRICS summit nung adentsü, ta Russia nung ketdangsertemi metetdaksüogo.

September 12-13 anogotem nung New Delhi nung BRICS summit ayongzükba lir. Iba senden aliba mapang nung Putin-i China Tir, Xi Jinping dena jurila senden ka amentsü.

Putin-i tesüsabuba India semdangbaji yaküm December ita nung liasü. Iba mapang nungji India nung Russia-India summit liasü.

Taoba hopta Russia foreign minister Sergey Lavrov-ia New Delhi semdanga BRICS foreign minister tem senden nung denogo.

BRICS nung züngsem linüktemji mezüngbo Brazil, Russia, India, China aser South Africa dang liasü saka 2024 küm iba telok nung Egypt, Ethiopia, Iran aser United Arab Emirates linüktem-a züngok aser 2025 küm Indonesia-a züngokogo.

BRICS nung aliba linüktem nung nütsüngji alima nütsüng shilem 49.5 shi lir, GDP shilem 40 aser alima nung shishilembaba shilem 26 lir.

### Tamil Nadu nung Congress MLA anati minister tenangzükba agitsü

**New Delhi, May 20 (Agencies):** Tesüiba küm 60 jungnüa Tamil Nadu cabinet nung Congress maliasü, ajisüaka Brihostibarnü Congress MLA anati Minister tenangzükba agia Cabinet nung züngoktsü.

Tamil Nadu nung Vijay-i aniba Tamilaga Vettri Kazhagam (TVK)-i Congress MLA ana- Rajesh Kumar aser P Vishwanathan na Cabinet nung anioktsü asüngdangba ama Congress Tir Mallikarjun Kharge-i agizükogo.

Bodhbarnü Congress national general secretary (organisation), K C Venugopal-i, Brihostibarnü party MLA anati minister tenangzükba agitsü, ta

metetdaksü. Venugopal-i X ajanga, "INC Tir Mallikarjun Kharge-i INC MLA ana Adv. Rajesh Kumar aser Thiru P. Vishwanathan na Tamil Nadu cabinet nung anioktsü melungogo. Asüng tenati minister tenangzükba agitsü. Iba ya onok asoshi puti otsü ka asütsü, kechiyong küm 59 sülen tang Tamil Nadu cabinet nung Congress züngoktsü," ta metetdaksü.

Tawa Tamil Nadu assembly elections nung Congress-i Dravida Munnetra Kazhagam den lokteper toktepa liasü, ajisüaka single-largest party TVK-i sorkar akümtsü atema Congress dang teyari meshiba ama Congress-i yaritsü lemteta liasü.



Bengaluru, May 20, 2026: Eid benjung atongtsü anogo ishika dang lia Bengaluru nung aliba Idgah Maidan nung napong aser san ayoktsü yua aliba noksa nung angur.



## TIR YIMYIM YIMOBILEM (EDITRIAL)

DIMAPUR THURSDAY, MAY (MONUPII) 21, 2026

### GB aser Dobashi

**N**agaland nung bendangertem arua yimsüsütsü tenzükba mapang nungi tanü tashi nübortem o yimten yimsüsür aser ketdangsertem na tsüngda tensa tajung majung ajak nung jilachitepa inyakertemji Goanbora aser Dobashitem ya lir. Atangji, yimtsüng shia nung akhi tsürabur mapang nungi yimsüsüa aruba putu menden aser tanü putu tasenba nung government ajanga tentetba village council yimsüsüba menden lir saka government nungdak nungbo Goanbora aser Dobashitem dang amshir, kechiyong parnokji government mapa nung yariteptsü asoshi shimba lir. Aji oda, pi oshi nung Goanbora-ji yimtsüng nung tambusang ta angatetsüa akok aser Dobashi-ji, Do basha, oshi ana ta asüba nungi jatetba tenüng ka lir, ibayongji, tanü asüng tanuburtem Goanbora asütsü shimdang, Goanbora memesük repranger aser asen oshi dak alaka tangar oshi mashiba nisung ka Dobashi shimra, pajia metemsü amai repranger. Aji oda, Naga lima nung pi oshi jembia zülubanglu nung amshitsü tenzükba mapang nungi tanü tashi government saru saruba aser osangbelenba tongtepratep mapatembo Goanbora-temiang inyaktsür saka tesasatsüka, parnok nembo ita sen magütsür. Ajsüaka, Dobashi-tem asoshibo tajung kaji, parnok nembo ita sen agütsür aser akhidang o meyiper asüba jenjang nungi tanübo obendanger jenjang tashi ajungkettsüogo. Aji oda, tanü Nagaland state kümmer küm 60 dak tali süia aodang, akhi mapang Dobashi aser Goanbora shimba maparentem indang meyipa reprangdanga jembiba angashir aser item inyakyim nung temelenshi nungdakba indanga jembir. Atangji, Dobashi shimba aser parnok inyakyim nungbo mangatetsüsa terataba aikabo mali saka parnoki amshiba Naga nunger sobaliba temzüng ozüngtem ya kin shia mesüra yimtsüng shia balala masü saka Naga nunger ajak atema sobaliba temzüng ozüng kasa dang asütsüsa latettsüla aser itemji tebang o dang masü saka joko tanü putu nungbo, linük temzüng amai, asen sobaliba temzüng ozünggia tezüluba nung alitsüla ta jembir. Ajsüaka, ano külen Goanbora shimba aser parnok inyakyim nungbo Naga kintem rongnung tashi (power) aser inyakyim (function) balala lir, kechiyong kin kar nungbo yimtak angh lir aser kin karbo yimkümertem rongnungiang Goanbora shimer saka government inyakyim apibo Nagaland ajunga nung Goanbora ya government-i shimer, anungji government tenyatenpongertem amai ka dang angateter. Ibayongji, tanü yimten aser lokti nung jembishinü dang, government nung alirtemi jembiba o Goanboratemi bilemba na meputepi tetsüngda talangka lir ama angateter. Ibaji angatetteptsü atema, ashiko, Nagaland tatar hoho nung Goanbora shimba yimya aser parnok nem agütsüba tashi aser inyakyim indang khen benoka jembir telatetba tasen ka agishi nungang tangatettep tajung kati arutsüa akok. Aji oda, Nagaland state government-i shimba Goanbora rongnung angh aser yimkümertem nungi yimtak kibur asütsü shimba lenirtemji Goanbora rongnung metendaktsüi parnokjibo sobaliba jenjang ka nung alitsüla. Ibaji dang masü saka Goanbora-tem ya government nungdak nung amshitsü shimer süra, parnok asoshia ita sen alitsüla. Goanbora-tem nem akhi mapang temerem sü agütsüba aser Dobashitem nem tula balaka yanglur semdaktsüba ajak ya tereprangtsübo junger saka otsü majung, kechiyong itemji tangar kübok aliba otsütem lir. Itemji khen meyipa reprangdanga bilemdangtsü nungdaker aser asenoka asen kolok aser shisatsü aienba yari putu den peta jayajako tenünga melentsü, sübosülemtsüa melentsü aser inyakyima melentsü ta ora, iba jagi asenok nem tangatetba tasen aser tajung agütsütsü. Aji oda, Goanbora aser Daboshi ta asüba tenüngtema tangar British nungertemi jatettsüba tenüngtem lir, iba jagi asen oshi dangibo anasaia marur. Itemjia bilemdanga asen Naga nunger oshi tapet bushia melena amshi nunga koda tapet aser akhüm taket süla !

## OLEMSABANG

### AJEMALUBAASER OCHISHIBANUNG TEMOATSÜ

~ IMTIKUMLA IMCHEN

*(Iba Yimdangjem otsü ya Tir Yimyim aser Bookipedia nati ayongba toktep nung shilem agirtem rongnung ka liasü)*

*(Yashi adok nungi...)*

Joko pa tazüngtsü tashi zünger Tsüngremer wadang nung inyaktsü mapang tonga aru. Telok aikati pa aginüa liasü, saka pai pei arogo medoktsünü. Kechiaser pa azüngba mapang par arogo-i yaria liasü. Pai ajak dang ajemalua dang ni ozü arogo nungi dang missionary mapa inyakdi, aser Tsüngremi mulungra ajakleni kibuba osang sangdonga jajadi ta ashi, pai jembiba o nung shingaia mesongtemteti dang liasü, kechiyong pai Tsüngrem sendong nung dang jembia liasü. Pai ashi ama ajaki mulunga dang agizük aser wadangji inyakmeso. Par arogo nungi tenzük alima ajakleni Tsüngrem osang bener jaja.

Iba mapang Tsüngremi pa nem sempet jendi agüja itemji inyaka jaja. 1)Tashidak tapu jenti aneptsü

2)Temenen tanüla aridoka liasu.

3)Samaba pur jenti. Yisu dangi anir arua sayatenya jenti inyaktetta senzüa lia arur kibong küma kinungtsü den jabaso jala den jangratema liasü. Iba mapang tashi nung tebu o tetsü na arishia ali yimdak tambuti aser tetsüti. Tebu küm 107 aser tetsü 105, iba tashi arishia alidang mezüng semchir, tanabuba, tasembuba semchir tashi tena den lir arishi tembang. Sayatenya ka ama dang tebu sür anogo ka danglir tetsü asü. Akümüli nung ochi shia Tsüngrem akümtsüba alirbo Tsüngremi pa nükjidong nung akümüli tembangdaksür ta ashiba tenadak atalok.

Tsüngrem o-i ashiba ama nisungi karbo tsürabur temoatsü nung taküm liyonga aodang kanga temoatsü aser tepela nung liyonga aor, saka kodang tsürabur südir temoatsü tho agi timtem mapangang melener azükaru mesüi akümer ta ashi ama kodang tena asü (tsürabur), tanur tebur asem rongnung teyongtsüba pai bendangtsür süngyanglu külemer agia alinung lai pei tsürabur dangi onü, kechiyong maka mait kümadok. Saka iba tetsürlaji tamangba balaka dang masü chia ajemba aser yimyayimpong ajak nung Khristan aser yimyayimpong ajak nung Khristan ama mesüi liasü, aji asünung teubai monü, saka lai kanga rongshi nung monüyonga aotsüsa aküm, kechiaser tetsürlar yimsü agi kodang kibong paladir tanurtem ajak tetsü den alitsu saka ajakji tebui mesütsü ta asüba ozüng liasü. Anungji tebuji koda mesüi kümadok. Parnok yim tsüngdaji tetsüng agibo anogo asemnü jajaba lenmang liasü. Joko koda masüji par kibong aposo. Pei tsürabur ki tonger parnok den külemi alitsüsa aküm. Kechiyong bendang lima libaliro keni dang balaka teyaritepera mali tsürabur den malinung ki makaba den chia ajemtsüa kecha mangu. Lia aodang tamangba balaka asü nung tsürabur kechi yimsü amanger aji amangtsü tim asünung joko pa-i lar yimsü amanga benjongpentsü, külemketja, chia ajemba ajak nung kasa inyaktsüsa aküm.

Tebubai temulung shirangba aser tematempa lai (tebuttsüi) kecha shisabulua mali odang kibong nung alir ajaki kilir ama amshi, pa-a (tebuba) temulung raksa-a pei tetsü tsürabur adianu külemi jangratema aliba tho pongmang amai bilemtetta, item khuret shia Tsüngrem dang sarasadema liasu. Küm aika dang pa timtema lir, pai tebuttsü dang par yimi aotsü ashi Saka tebuttsüi monui songtem, timtem jenti ajuruba den rongsen maka maitji dang Tsüngrema mekülemteti akümbayong temulung shirangseta liasu, joko pa timtemji tali aküm nung, süaka kümaka kübo nunger limai aotsü ta mulungteta nibo odang onür ta dang ashi. Saka tebuttsüi yangi melinura nü kisung or liang ta asaloktsü. Yamaji tia tamajung nungi pila aliba tajungba ta mulungteta tasüngnep apuso. Par kibong aodang lar yim atongsü anogo asem jajaba lenmang pai anogo pezünü jaja, kechiyong lenmang nung yasatsüra timtemseta jajar par yim atong. Par kinüngertem ajak kanga süngmangadok. pa tejakji külemi aliba ama mesüi sorobangru balaka den tani tebelem asüba agi nisung memesüki atong. Pa shisabulu ajakji ashi nungang kinüngertemi pa meteta aru. kechiyong tashi mait agi kanga zukla zukla-a liasü. Tesülen otsü ajakji shiyonga or ang pa temulung süngzuk, kinungertemia yarimeso.

*(Maneni asüng adok nungi...)*

**Iba Olemsabang nung lemsaba ken-o aser shisatsü ya iba ocet züluri bilemba ken-o ama tazünger angateta agitsü mepishir**

## United Bible Societies (UBS) fellowship kum 80 jungogo



Jakarta, May 2026: United Bible Societies fellowship kum 80 ajungbamong sentong nung United Bible Societies Secretary General, Dirk Gevers-i jembidang tangokba noksa nung angur.

**May 20, 2026:** Tan May ita nung United Bible Societies (UBS) ministry kum 80 ajungbamong nungtem nung parnoki asentenshir alima tesem ajaklen lanurtem nem Laishiba agütsütsü atema inyaksü atemzükogo.

May 6 nungi tenzuka May 11 tashi Jakarta nung United Bible Societies kum 80 ajungba amongba mapang nung parnoki "The Bible for Tomorrow: A Global Commitment to Future Christian Generations" sangdonga liasü. United Bible Societies nung fellowship 156 densema lir.

UBS-i Bible Societies tenzuka mapang nung parnok mangdangji "Ajak atema Laishiba" liasü.

Tang putu mapang ya lanurtem rongnung tanela atema odiodia jangrabangraba mapang ka lir, ta parnoki metetdaksü.

World War II tembangba sülen 1946 kum May ita nung UBS ya tenteta liasü saka Laishiba movement yabo tenzükur kum 200 dak tema jungogo.

Tanübo UBS fellowship-i linük aser territories 240 dak tema nung inyaker aser alima nung oshi balala nung Laishiba meyipzükba shilem 70 bo parnoki inyakba lir, aser ibaji ajanga alima nung nütsung billion 6.2 dak temai pei oshi nung Laishiba angur.

UBS Secretary General, Dirk Gevers-i, kum 80 ajungbamong ya Tsüngrem nem tenüngsang agütsütsü aser asentenshir meranga inyaksü mapang ka lir, ta ashi.

"Tsüngremi asenok dang ajungba atema Pa dang pelar aser Aso 19buba tenzükba mapang nungi oshi balala nung Laishiba meyipzükba nung shilem agir ajak dang pelar. Laishiba ajanga maneni lanurtem nem teimla aser ochi agütsüba den lenmang sayutsü ta asenoki amanger," ta Gevers-i metetdaksü.

UBS sangdong nungji yamai shia lir, "Rara aliba lima ka,

tarutsü tia mejangjaba aser ratamataba putu mapang ka nung lanurtem aikati kechi inyaksüar memetet. Laishiba ajanga rongnentsü agütsür aser teimla agütsür. Meimchirtemi ochi, temeden aser tesünep bushiba dak sendakba nung tasüngdangbatem atema Laishibai telanzüba agütsür."

Kasa sangdong nung yamai shia lir, "Laishiba ajanga Yisu ajanga Tsüngrem den sendakteptsür."

UBS sangdong nungsa tenanzükba onük trok lir, aser item rongnung- UBS-i inyakba maparen ajak nung Lai O, sarasadem aser Tanela Temeshi ajanga Tsüngrem dang nungi tetuyuba meshitsü, meimchir ajaki Laishiba angutsü atema Lai meyipzükba

mapa tuluba atemzuka inyaksü, Laishiba kaket den külemi digital, audio, braille aser sign language formats nung Lai ajanga mayimjembapurtem ayimjemtsü, Lai O taroki bushitsü aser nütsüngsütsü, Arogotem tenzüksü aser Khrista tsüngsü nung jajatsü densema lir.

UBS-i alima tesem balala nung Arogotem, ministries aser Khristan partners ajak dang iba maparen nung yariteptsü tayongzükba agütsü.

UBS sangdong nung yamai shia lir, "Ajemalushir Tsüngrem dak tamang kaa Bible Societies 156-i fellowship ka ama asentenshir iba mangdang tejakleni bener aotsü; tang aser tarutsü pututem atema ajak asoshi Laishiba."

## ANOGO ABEN TSÜNGREM DEN

### Nüji akümba

"Asenok Tsüngrem chirtem ta Tanelai peisasa asen tanela den kuli agütsür."

Rom 8: 16

Kodang Israel chirtemi Mosa ozüng agizük parnoki ashi, "onoki Kibubai ashiba ajak inyaksü." Saka ozüng 613 jagi parnok taküm asoshi kechi aji mangatet, mesüra ozüng jagi parnok taküm nung kechi inyaker parnoki memetet. Iba ama mangatetba mapang ka Kibuba Yisu tabensa nisung ka ama ozüng kübok aso. Ozüng atalokdakja tabensa nisung ka ama tang pa ali masü, saka Pai ozüngjia temaba jenjangi ajungkettsü. Shingaia ozüngi aginüba ama meinyaktet nung Tsüngrem sentsüwangshi metongteti aitsü. Ozüngi ajak aibelenba kümdaksü aser talenba kübok ayu.

Tsüngrem temeshi ozüng o bendangba nungi kümzüksü asoshi tabensa taküm ka nungdaka aküm. Tsüngremitalila agutsübaji Par Chir kangki nung südaktsü. Khristai mapa tulu atalokdaksüba rongnung temenen nungi kümzuka putepshidaksüba, aser Tsüngrem melen agütsübaji liasü. Iba den Khristai ozüng dang tashi angabaji agien. Süngdong nung metabas ajanga pai ozüng atakatem agien. Tsüngremi Khrista dak temulung asü, Pai asenok ozüng sentsü ajak indoktsü (Kol. 2: 14). Ozüng temenen aser tasüba indoktsüba ajanga Tsüngremi Khristaji Kümtetdakba kümdaksü. Khristaji asenok menen asoshi asü ta amangba tetezü, ozüng nungi nüji akümba aser Khrista mesük akümba lir.

## UBF Conference nung lanur 1,000-i missionary inyaksü nangzük



South Korea kübok Goyang yimti nung aliba KINTEX Convention Center nung University Bible Fellowship (UBF) 19buba World Mission Conference nung adeneritem tangokba noksa nung angur.

**May 20, 2026:** Taoba Honibarnü (May 16) South Korea kübok Goyang yimti nung aliba KINTEX Convention Center nung University Bible Fellowship (UBF)-i 19buba World Mission Conference ayongzuka agiogo.

Iba conference nung South Korea nungi nisung 4,000 shi aser linük balala nungi missionary 700 dak tali aden.

Tesüiba kum 10 tsüngda tang mezüng UBF World Mission Conference ya ayongzuka agiogo, talisa coronavirus wara aliba ajanga iba senden kum aika magiteti aru.

Mission Conference nungji lanur 1,000-i missionary inyaksü

tenanzükba agi; parnok teimbaka University students liasü.

Parnok kari mapang atakteta tenzüksü aser karibo akümli piyong missionary inyaksü atema pledge cards nung tenanzükba agi, ta kasa osang ajanga metetdaksü.

Iba conference ya Isaia tapu 6 nung ajemdaker agi, talisa iba Lai tapu nung aliba lai tekong ka- "Ni shiba yoktsü?" omen amshia liasü.

Iba sentong nung jembidang UBF World Representative, Rev. Ranward-i, "Alima nung mission mapa inyaksü atema Tsüngremi tanü-a asenok ajar," ta ashi.

Paisa lanurtem dang iba tayongzükba agizuka campus evangelism aser mission mapa nung shilem agitsü ayongzuka liasü.

May 17 nü iba conference nung UBF world representative pastor, Ron Ward-ia, "Asenok atema shiba aotsü?" onük jembia liasü.

Iba conference nung Kazakhstan, Japan, Mexico aser United States linüktem nungi lanur pezüi taküm kuli lemsatepa liasü. Par pezüpronglai, parnok taküm nung nükjidong kecha makai nemzua liasü, ajisüaka Korea nung missionary temi parnok den Khrista osangtajung

lemsatepa sülen tangbo parnoki university students den Khrista osang lemsateper, ta ashi.

Kasa conference nung Isaia kaket nung ajemdaker jilushi ka saya. Iba dak alia choral ken atenba den külemi shilem balala agia liasü.

Iba conference tembangba sülen UBF-i May 18 nungi May 20 tashi Gangwon Province kübok Alpensia Resort nung Missionary Shepherd Retreat ka ayongzuka agi. Iba Retreat nung missionary tem densema nisung 800 shi aden.

Iba dak alia kasa mapang nung Hwaseong, Gyeonggi Province nung bendanger lanurtem aser university students 100 atema K-Mission Camp ka ayongzuka agi.

UBF ya 1961 kum asür, Rev. Samuel Lee aser American Southern Presbyterian missionary Sara Barry nati tenzuka liasü. Mezüngbo UBF-i South Korea nung aliba university ana nung Bible study groups tentetja liasü.

Tangbo iba organization indang chapters 90-i campus 120 nung tenzükur.

UBF-i linük 94 nung missionary 2,000 dak tali yoka lir.

AO OSHI ANGAZÜKDAK:

TANÜ ANGAZÜKTSÜBA OJANG



Yaya

(v) chiyongtsü achidang tebang mesaka aitba (burning sensation on mouth while eating some kind of leaves.)

\* Mongmong karbo kanga yayar.

Yayim

(v) shitakbalen, timlen (orderly)

\* Yayim shitak meteta inyakba nung mangatettep madoker.

OLONG PAITEP # 7510

15x15 crossword grid with numbers 1-17 indicating starting positions for clues.

TIPILEN

- 1. Nisung jenti - (5)
4. Tsük rudenba - (5)
6. Temzüng tesashi - (5)
8. S \_\_\_ i - (3)
9. Nisung telemsa - (3)
10. Anogoshi - (4)
12. Ajanga aor - (4)
13. Tsük rizüngdak - (3)
14. Tebang nungi adokba - (3)
16. Süngdong tatembangtiba - (5)
17. Meputep - (5)

LANGTSÜNGLEN

- 1. Tenük telong - (9)
2. Committee dang ajar - (5)
3. Yagi ki okdoker - (7)
5. Yim lenmang - (5)
7. Temoatsü keter meyipa aruba - (9)
11. Kanga junga menemba - (7)
12. Majinü - (5)
13. Tzüma nung senzüba - (5)

OLONG PAITEP # 7509 TELANGZÜBA

TIPILEN :

- 1. Telok, 4. Aluru, 6. Ozüng, 8. Emk, 9. Kin, 10. Teti, 12. Süir, 13. Jen, 14. Ola, 16. Talak, 17. Mazük.

LANGTSÜNGLEN :

- 1. Tenükjang, 2. Luden, 3. Kiochtsü, 5. Lenti, 7. Tajangzük, 11. Teronem, 12. Sempa, 13. Jahaz.

NAI-A YA METETTER



China nung arishi küm 33 tain Yan Jianghua-i "most face changes in a single performance" atema Guinness World Record ka yangluogo. Yan Jianghua ya Sichuan opera artist ka lir aser show ka nung pai masks 29 tashi melenteta shilem agiba ajangaiba otsü tasen yanglutet.

Assam sorkari DigiPay Sakhis 71 nem laptops agütsü



Guwahati, May 20, 2026

(Agencies): Assam nung May 19, 2026 nü DAY-NRLM scheme kübok DigiPay Sakhis 71 nem laptops agütsüogo.

Teküpoktiba jenjang nung digital financial inclusion tashi aittsü aser tetsürtem nem tashi

agütsütsü atema Amingaon nung sentong ka nung laptops lema agütsü.

Iba sentong nung Kamrup District Administration nungi Deba Kumar Mishra aser ketdangsürtem aden.

Self-Help Group tetsürtem

community banking agents ama kuma digital banking services maparen akangshitsü atema iba mapa inyaker.

Iba mapa ya Antyodaya aser Assam Chief Minister Himanta Biswa Sarma-i tetsür nem tashi agütsütsü jembiba den puteper ta ketdangsürtemi ashi.

Sorkari DigiPay Sakhis scheme ajanga sorkari Direct Benefit Transfer (DBT) tajungba inyaka aotsü, tiyongtsü nung inyakertem melidaksütsü aser teküpoktiba jenjang tashi welfare benefits tongdaksütsü atema inyaker.

Iba scheme ajanga Assam nung yimtsüng nung alirtem financial literacy aser digital access tajungba akümütsü alizüng lir.

Meghalaya nung North East India Infrastructure Summit alitsü

Shillong, May 20, 2026

(Agencies): Meghalaya nung June 11 aser 12 anogotem North East India Infrastructure Summit and Exhibition (NEIINFRA) amungtsü sentong lir.

Iba sentong ajanga sorkar ketdangsürtem, investors, financial institutions aser business leaders külemi adenshitsu aser infrastructure growth, connectivity o regional investment atema lenmangtem bushitsü.

Meghalaya Chief Minister Conrad K. Sangma-i New Delhi nung iba osang metetdaksü

asertesüiba küm ishika Meghalaya nung economic expansion akangshia arur ta ashi.

Testüiba küm pungu tsüngda Meghalaya economy anaben agi teimba kümogo aser 2018 nungi capital investment pezüben agi teimba kümogo ta pai ashi.

Testüiba küm ishika ainba ajanga Meghalaya nung investor temi temulung alemer aser linük nung fastest-growing economies rongnung züngsemogo ta CM Conrad-isa ashi.

Meghalaya-i entrepreneurship

asertechology nung shilem agir aser startup ecosystem yangluogo. Mezüngbuba IT park lapoktsü ana nung lir aser domestic o international company temi tanabuba IT park lapoktsü atema asüngdangar ta paisa metetdaksü.

"Centre sorkari northeast nung infrastructure-led development aser connectivity akangshiba nung maneni yaritsü. Meghalaya sorkari terenlok maparen inyakba angur" ta Ministry of Development of North Eastern Region nung Secretary Sanjay Jaju-ia ashi.

Conrad-i Tura nung 41 Meghalaya Battalion NCC lapoktsü



Shillong, May 20, 2026

(Agencies): Chief Minister Conrad K. Sangma-i Cherangre, Tura nung 41 Meghalaya Battalion NCC lapoktsüogo.

"National Cadet Corps ajanga lanurtem dang tashi angatsü, linük meimtsü, lenitsü aser jaklaliro tajung alitsü sayur. Tura nung iba battalion amenokba ya pungmang ka asangsang akümba ama lir" ta Conrad-i ashi.

Pa tanur asüdang armed forces nung adentsü jangraba aser iba sülen ina arudang police service nükshiba indang Conrad-i menungraa lemsatep.

Uniform mapa nung tashi angaba aser bendanga agütsüba lir aser iba jagi pai kanga

jangraa liasü ta paisa ashi.

NCC ajanga tebilemstü abenba sensotem aser tarutsü lennirtem aniteter ta CM Conrad-isa metetdaksü.

"Terenlok asadangtsübaji infrastructure nung sen endokba dang masü saka sorkar scheme balala ajanga nisung taküm melenshidaksüba dena lir. Sorkari terenlok indang mandang nung Meghalaya lanurtem dena lir aser state nütsüng yongsük 75% shi ka arishi küm 35 ser teküpokpur lir" ta Conrad-i ashi.

State sorkari NCC infrastructure aser facilities tashi itdaksütsü asoshi maneni pusema nungittsü ta paisa shisem.

41 Meghalaya Battalion

NCC ya 1961 küm 15 Assam Artillery Battery NCC nung tera yanga lir. Iba ya October 2020 nung battalion jenjang nung ajungket aser tang iba battalion ajanga Garo Hills kübok district pungu nung NCC activities ketdangsüa repranger.

Border Area Expansion Plan kübok battalion-i college 3 aser school 6 nungi college 7 aser school 18 kümogo. May 2026 tashi nung iba Battalion nung cadets 2,400 shi züngsema lir ta ketdangsürtemi ashi.

March 3, 2026 nü iba battalion ya Shillong nungi Tura belen aser iba ya Garo Hills region nung NCC outreach aser operational capabilities tashi itdaksütsü atema liasü.

# SANGDONGER

Advisor for Sericulture & Minority Affairs Government of Nagaland, Imkongmar-i May 18-19, 2026 anogotem constituency (25 Mongoya AC) sema senzua liasü. Iba mapang units 11, village councils, Town councils tem ayimjema constituency nung nübürtem den sensaksema aser senden balala mena liasü. Ano iba mapang Penli aser Majakong wards nung NPF party treasurer ki nung nisan songa liasü. Iba tour sentong ya N. Bendang Jamir, Senior Vice President NPF Central and PDA member aser NPF Mokokchung Division nungti ketdangsür aser constituency nung NPF party workers teka amteper ayongzüka agia liasü. Party indang grassroots level tali tejangjaba metettsü aser constituency ajungkettsü aser terenlok asoshi nükjiding yur iba tour ya ayongzüka liasü.

**Sd/-**  
**Yimya Jamir**  
**President,**  
**25 Mongoya AC**

**Sd/-**  
**Meyiyanger**  
**General Secretary (Admn),**  
**25 Mongoya AC**

# TENÜNGSANG AGÜTSÜR



Choto Lengri Ao Union Karbi Anglong ajanga, **Sb. Dr. Moatoshi Longkumer**, Wb. Tako Longkumer aser Wt. Amongla Imsong-er jabaso-i, Thesis "Investigation on Co and Mn substitution in M- Type Barium and Strontium Hexaferrites for Prospective Permanent Magnet Applications" shilensayur Associate Professor Dr. Jyoti Prasad Borah, Department of Science and Humanities (Physics), National Institute of Technology, Nagaland kübok inyaka, tematiba jenjang Ph.D in Physics ngutetba asoshi, iba sangdong ajanga tenüngsang agutsüba lemsateper.  
Tsüngremi maneni moajangma.

**Sd/-**  
**President**  
**Imlichuba Jamir**  
**CLAU, KA Assam.**

**Sd/-**  
**Gen. Secretary**  
**Bendangyanger**  
**CLAU, KA Assam.**

Office of the  
**MOSEM SEMCHIR LONGSA VILLAGE**

Mokokchung, Nagaland-798601

## MEYIPTSÜR

Ao Milen adok 8 May, 2026 Awer Jamir Mungdong office ajanga Mosem Semchir Asem (3), (i) Lumongdong (ii) Mongka aser (iii) Metsübo dang ta alima dang sangdongbaji Otsüla aser Oboula nunger otsüren raksaja Puti nung aibelenba aser ano Longjakrep Semchir Mungdangi adokba (Lirem Kaket) mezümgmeshir. Iba den Mosem Semchir pongu (5) Lumongdong, Mongka, Metsübo, Wacha aser Tamang, parnok adianu tarensen kecha kuli makaba osang ajanga Aoli sanger makmakshishidakja tiazü osang sangdongbaji ozü Mosem Semchir adianu Pongu (5) longjemer tatem tashi bushitsü ta metetdaksür.

### Mosem Semchir Longsa:-

1. Lipokmerem. Tatar Lumongdong
2. Imsütoshi. Tatar Mongka
3. Limaakum. Tatar Metsübo
4. Rongsenmongba. Tatar Metsübo

## Nigeria nung ISIL züngsem 175 tepsetogo

**Abuja, Monupii/May 20 (Agencies):** United States den sendaktepa inyaka aliba Nigeria nunger sepaitemi ashiba agi, parnoki anogo ishika tsüngda linük northeast nung ISIL (ISIS) züngsem 175 tepsetogo.

Nigerian Defence Headquarters-i Mongolbarnü ashiba agi, US military indang Africa Command (AFRICOM) den longjemer inyakba mapang ISIL aser ISIL affiliate in West Africa Province (ISWAP) nungeri amshiba checkpoint, prangbong injang, logistics hub tem, hadir balala aser financing network tem raksatsüogo.

"May 19 nü tashi nung ken o asadanga sülen ISIS kiralongrar 175 tepsetba jangjaogo," ta Nigerian Defence Headquarters otongdar Major-General Samaila Uba-i sangdong ka ajanga metetdaksü.

"Nigeria nung Armed Force temi Nigeria kübok tesem balala

nung kiralongrartem bushia oa tepseta aliba tang longjemer inyakba ajanga tali tashi taitba kümdaktsüogo," ta Uba-i ashi.

Nigeria sorkar den longjemer Deobarnü tesem balala makogo ta AFRICOM-i ashiba sülen iba osang metetdaksüogo. Maneni Nigeria tir Bola Ahmed Tinubu-i, Nigeria-US sepaitem longjemer meita aoba mapang ISIL indang second-in-command Abu Bilal al-Minuki den pa kübok inyaktertem aika tepsetogo, ta ashiba sülen iba osang ya agütsüogo.

Nigeria Army-i ashiba agi, Sahel aser West Africa kübok tesem balala nung ISIL operation tem ya al-Minuki-i ketdangsüa liasü.

Al-Minuki asüba osang sangdongba sülen Tinubu-i, social media nung post ka ajanga US tir Donald Trump dang kanga pelaba lemsatepogo.

Nigeria military-isa, Mongolbarnü sangdong ka

ajanga lenir tejen Abd-al Wahhab tepsetba sangdongogo, shibai ISWAP atema sentong balala yanglua liasü. pa den ISWAP züngsem tejen Abu Musa al-Mangawi aser Abu al-Muthanna al-Muhajir nata tepsetogo, ta kasa sangdong ajanga metetdaksü.

Middle East nung tamakok anguba sülen ISIL ya Africa nung inyaksangshi tenzükogo aser 2026 küm mezüngbuba ita asem nung iba telok inyakyim shilem 86 bo Africa nung benoka inyakba mangaoka lir, ta crisis monitoring group Armed Conflict Location & Event Data ajanga sayuogo.

US-i, February ita Nigeria-i parnok sepaitem yokba sangdongogo. US nunger sepaitem ya tongtibangsa training aser tetuyuba balala agütsüsa atema yok, saka tawa meita aoba sentong balala nung tali shilem agi tenzükogo, aser iba ajanga Nigeria nung US-i yakbang süa shilem agiba sayur.

## Xi aser Putin lungjemer US aitsü, saka gas deal balaka meyanglutet

**Beijing, Monupii/May 20 (Agencies):** China Tir Xi Jinping-i Beijing nung US Tir Donald Trump den ajuruteper hopta ka lir China aser Russia nati Bodhbarnü senden ka amendang Trump indang Golden Dome missile defence shield plans aser Washington indang nuclear policy aitsü.

Xi-i Russia Tir Vladimir Putin den senden amenba sülen külemi sangdong ka agütsüba nung China leniri Trump den tesendaktep tajung aginüba shia lir aser Russia den lirumedema aliba jenjangtem nung tangatetba balala liasü.

Trump indang ground- and space-based missile interceptor system sentong ya alima atema tebilemstü lir ta sangdong ajanga ashi aser US aser Russian nuclear arsenal atema tezüngzüktep ka liwadaktsüba atema Washington aitsü.

Iba treaty ya February ita

liwadaktsüogo aser Moscow-i missile aser warhead aziökba ano küm ka atsülangtsü benokba nung Trump-i telangzüba magütsü.

Alima security onük atema lungjemer jembiaika lenir ana yagi China dang natural gas anasü agi tali ayoktsü asoshi pipeline tasen atema Moscow-i mapang talangka nungi meranga aruba indang tangatettep kati marutet.

Anogo ishika tsüngta China leniri US aser Russia nungi tiri anir ketdangsürtem den ajurutepe senden amenba ajanga Beijing ya alima nung yimtenren tsütsü tongtipang tongshi ka ama sayur.

Trump den senden amenba ya tuluba tensa ketdangsütsü asoshi liasü, saka Putin den ajurutepeba yabo linük ana tsüngta telatet makai tesendaktep tajung alitsü züngzüktepba sayur ama liasü.

Xi aser Putin na 40 ben dak tali ajurutepe lir, aser tenati 2022 küm züngzüktepba ama Russia-China tesendaktep nung temulung tali agütsür.

Putin marudang Moscow-i China den energy agreements tali bushir ta angatetdaksü, koba Russia nunger totzü timtiba aliba linük lir.

China-i long-term Russian oil supplies aser volume timba akumtsü jangrar, ta Russian Deputy Prime Minister Alexander Novak-i ashi.

Taoba küm September ita Putin-i China semdangba mapang, Power of Siberia 2 inyaksü linük anaprongi mulungtep ta Russian gas giant Gazprom-i shia liasü, koba Russia nungi Mongolia ajanga China tangi küm nung gas 50 billion cubic metres (bcm) abentsü asoshi 2,600-km (1,616-mile) pipeline yanglutsüba mangdang lir.

(Maneni tapak 8 nung...)

## Germany-i Turkey nem Patriot air defence system agütsütsü

**Ankara, Monupii/May 20 (Agencies):** Turkey-i Bodhbarnü ashiba agi, Germany-i June nungi tenzüka ita trok atema Patriot missile defence system ka yoktsü. Iran nung rara adoker aliba ajanga southeast Turkey nung air defences akangshitsü atema NATO-i jenjang agiba nung shilem ka ama system ka amenokja aliba tang iba defence system yagi melentsü.

March ita Ankara-i ashiba agi, Iran-i amokmerenba mapang U.S. Patriot system ka southeast Turkey nung NATO radar base ka anasa amenoktsüogo. NATO defence temi rara mapang Iran nungi yokba ballistic missile pezü khadanga liasü.

"Linük nung tang amenoka aliba Spanish Patriot air defence system den bendenloksema, U.S., Israel, aser Iran tsüngda

mangatettep adoker aliba ajanga NATO-i Patriot system talila ana amenokja aliba ya German system ka agi melentsü," ta Turkish Defence Ministry-i sangdong ka ajanga metetdaksü.

"Air defence system ya June ita tashi nungbo melentsü sentong lir, aser iba system ya ita trok tashi inyaksangshitsü," ta Ministry-i ashiba den, onok den sendaktepa aliba linüktem den angatettepa security ken o maneni asadanga alitsü, ta shisem.

Turkey ya NATO indang army tulutiba rongnung tanabuba lir aser parnoki kümtem tsüngda defence industry dak sendakba nung tangar dak metaloker malitsü atema jenjang agia arudar. Ajisüaika parnok ket nung air defence peria mali aser NATO indang system tem dak metaloker lir.



Yangon, May 20 : Myanmar nung Mandalay region kübok Sintgaing jila nung ninang metsürtem mapa inyakba noksa nung angur. Myanmar nung ninang metsür 800 dak tema aser private sector nung bee colonies 200,000 dak tema aser government sector nung 13,000 dak tema Bodhbarnü World Bee Day mungogo.

### Bangladesh-i otsüsüsüsa Pakistan den Test asayamung kokogo



**Monupii/May 20, 2026 (Agencies):** Sylhet nung tanabuba Test run 78 agi akokba sülen Bangladesh-i otsüsüsüsa kidang tang mezüngbuba Pakistan den Test asayamung ka kokogo.

Spinner Tajjul Islam-i wicket trok agia Bangladesh team-i Bodhbarnü asaya tenzüker anogo pongububa nung asaya koka liasü.

Tatembangbuba anogo run 437 arishiba mapang Pakistan team asayar 7 out ser run 316 yanglur lia asaya tenzüker, saka parnok nem run 328 dang yangludaktsür ajak out sütsü. Parnok rongnungi Mohammad Rizwan-i mezüngbuba session nung run 94 yanglua liasü.

Bangladesh-i tang Maneni Tajjul-isa,

mezüngbuba Kidang Pakistan den Test asayamung ka kokogo. Parnoki 2024 küm Pakistan nung oa Test asayamung ka 2-0 agi koker liasü.

Pezünübuba Pakistan team-i asayar 5 out ser run 162 tang yangluteta liasü, ajisüaka Wicketkeeper Rizwan-i ball 166 tashi asaya-a Pakistan nem timla agütsü.

Rizwan aser Sajid Khan na senteper run 54 yanglua liasü. Sajid-ia run 28 yanglu.

Ajisüaka Tajjul-i Sajid out süja Test asaya nung 18benbuba wicket pongu agi aser taruba over nung Shoriful Islam-i Rizwan out sütsüba sülen Pakistan team jenjang mejungi aküm.

tatembangbuba wicket Khurram Shahzad out süja iba asaya nung pai run 120 agütsür wicket 6 agia liasü.

Mezüngbuba innings nunga left-arm spinner yagi run 67 agütsür wicket 3 agia liasü.

Bangladesh wicketkeeper Litton Das-i mezüngbuba innings nung run 126 yanglua liasü.

Batsman tejen Mushfiqur Rahim-i tanabuba innings nung run 137 yanglua Bangladesh team-i run 390 yangluba nung teyari agütsü aser pa nem Mahmudul Hasan Joy (52) aser Litton (69) natia teyari agütsü.

Najmul Hossain Shanto-i aniba Bangladesh team yagi mezüngbuba Test asaya-a run 104 agi koker liasü.

### Küm 22 sülen Arsenal-i Premier League title benogo



**Monupii/May 20, 2026 (Agencies):** Küm 22 sülen Arsenal-i tang mezüngbuba Premier league title benogo. Mongolbarnü defending champions Manchester City aser AFC Bournemouth na goal kaka dang agütsür asaya tembanga sülen Arsenal-i takok nguogo.

PL title abentsü atema maneni tokteptsü asoshi asaya akoktsü nüngdaka City pur Mongolbarnü asaya saka parnoki asaya mekokteti liasü. Iba asaya draw asüba sülen league nung asaya kaka

asayatsü anunga lia Arsenal puri title benatokogo.

Mikel Arteta lenisüba nung asayaba North London club ya taoba season asem tashi tanabuba jenjang nung dang tembanga aruba sülen taküm takok ngutetogo. Iba title abenba ya parnok asoshi küm trok tsüngda mezüngbuba takok marnok ka anguba asütsü. Maneni 2004 küm sülen parnoki tang mezüngbuba Premier League kokogo.

Hombarnü Burnley goal 1-0 agi akokba sülen parnok iba

asayamung akoktsü atema anasabai ao, kechiyong parnok Manchester City dang nungi point pongu agi timba aküm aser Guardiola-i aniba team ya title atema maneni tokteptsü asoshi Bournemouth den asaya akoktsü nüngdaka kümdaktsü.

City-i iba asaya makokba sülen north London nung fan tem benjungtep tenzüka liasü. Arteta lenisüba nung küm aika team yanglushia aruba sülen Arsenal puri mapang talangka nungi yongya ata aliba ama Premier league kokogo.

### Baby League Grass root football 2026 June 13 nü asayatsü

**Dimapur, Monupii/May 20 (TYO):** Department of Youth Resources and Sports-i sangdong ka ajanga, tejangrartem dang Department-i June 13 nü BABY LEAGUE GRASS ROOT FOOTBALL 2026 ayongzüka asayatsü ta metetdaktsüogo.

Iba asayamung ya Indira Gandhi Stadium, Kohima nung asayatsü.

League nükjidongji tanurtem yongsü nung Physical Fitness ajungkettsü aser iba asaya ya career ama agütsü atema tanurtem anitetsü asoshi sabang ka agütsütsü atema lir. Asayamung nung shilem agiba dak ajemdaker department-i asayar tem shimsü aser parnok nem tenüngdakba training/coaching agütsütsü.

Iba asayamung nung shilem

agütsü janrartemi form agizüka kanga junga fill up ser June 11 nü tashi nungbo Directorate of Youth Resources and Sports office nung agütsütsü metetdaktsüogo.

Iba asayamung ya arishi küm 5 nungi 12 tsüngda aliba tetsür aser tebur tanurtem atema ayongzüka lir.

Asayamung nung shilem agir ajak nem refreshment den Jersey aser shorts agütsütsü.

Asayamung nung shilem agirtemi pei indang football boots, shin guard, Stocking, gloves aser tzü bottle bener arutsüla.

Ken o dak sendakba nung osang tejangjaba agütsü atema item number; 7630098992/9402211604/8787651909 nung t o n g t e p r a t e p t s ü metetdaktsüogo.

### Carlos Alcaraz Wimbledon nung masayatsü

**Monupii/May 20, 2026 (Agencies):** Grand Slam tenetben koker alisang Carlos Alcaraz-i pa Wimbledon nung masayatsü ta shiogo, kechiyong pa tekanük yiruba tang tashi taneptsü junga mongui lir. Iba timtem ajanga pa French Open nunga masayatetsüsa kümogo.

Alcaraz taoba ita Barcelona Open mezüngbuba round nung asayaba mapang teka tachichilen tekanük yiruba sülen iba asayamung nung masayatetsüsa aküm. Iba sülen pa French Open nunga shilem magütsü atema telemtetba agi.

Tang Alcaraz taruba Grand Slam nunga masayatetsüsa kümogo, koba June 29 nungi July 12 tashi asayatsü lir. Pa August ita National Bank Open nungbo asayatetsü akok.

"Ni taneptsü nguyonga odar aser tang tajungba lir, saka tia

maka ni asayatsü ano renema mali, ibayongji Queen's aser Wimbledon nung grass-court asayamung nungi atsüngintsüsa kümogo," ta Alcaraz-i Mongolbarnü nikongtsütsü tweet asü.

Alcaraz taoba küm defending champion ama Wimbledon nung asaya, saka pa final nung Jannik Sinner-i tsükdakja liasü. Taküm season tetenzüklen Alcaraz-i mezüngbuba Australian Open title bena pa ya Grand Slam pezüprongla akokba asayar tem rongnung tanobusang aküm.

Season takok nung tenzüka sülen Alcaraz 2026 küma takok ngua asayayonga aotsü imla liasü südi, saka pa yiruba ajanga grass-court season ajunga aser clay nung asayaba asayamungtem nunga masayatetsüsa kümogo.

### BENDANGLI OSANG : Tapak 7 nungi...

#### Xi aser Putin lungjemer US aitsü...

China-i yimjak nung iba project indang kangabo mejembir. Bodhbarnü Xi-i energy aser resources tesendaktep nung amalitep ya China-Russia tesendaktep nung "ballast stone" asütsüla ta ashi saka pipeline indang mejembi.

Linük anaprongi iba project indang rangben angatetogo saka iba dak alia tejangjaba mesüra mapang telatet indang mejembi, ta Kremlin-i ashi. Novak-i pipeline ajanga gas agütsütsü contracts renemba

mapang lir ta ashi. Xi aser Putin na külemi sangdong agütsüba nung artificial intelligence nungi tenzüka kanga anünga aliba kiyi, morok kiyi aser pandas tem wazüka ayuba nung amalitep akatsü asoshi sentongtem lemsatapa liasü.

US aser Israel nati international law nung aibelena Iran amak ta tenati aitsü aser "hegemonism" aser "unilateralism" anema temlungtetba tulu nung nokdakba lemsatapa.

### BILEMDANGANG

"Nü ket nung kechi ali aji agi temlung sür alitsü merangang."